

## Kusudi Moja la Kuheshimiwa Zaidi

*Maana naliazimu nisijue neno lo lote kwenu ila Yesu Kristo, naye amesulibiwa.... Na neno langu na kububiri kwangu hakukuwa kwa maneno ya hekima yenye kushawishi akili za watu, bali kwa dalili za Roho na za nguvu.—1 Wakorintho 2:2 – 4.*

**K**wa Paulo, msalaba ulikuwa ni kitu kilichokuwa kimeuteka upendo wake. Tangu alipoduwazwa akiwa kwenye jukumu lake la kuwatesa wafuasi wa Mnazarayo, alikuwa hajaacha kujivunia msalaba. Wakati huo alikuwa amepewa ufunuo wa upendo wa Mungu usio na mwisho, kama ulivyodhihirishwa katika kifo cha Kristo; na mabadiliko ya ajabu yalikuwa yamefanyika katika maisha yake; na kuileta mipango na makusudio yake ya maisha katika upatanifu na mbingu. Tangu wakati huo, amekuwa mtu mpya katika Kristo. Kwa uzoefu wake binafsi, alikuwa ametambua kuwa mwenye dhambi anapokuwa ameutazama upendo wa Baba, navyoonekana katika kafara na Mwanawe, na kujitoa kwa mvuto wa kimbingu, badiliko la moyo huwa linatokea na kuanzia hapo na kuendelea Kristo huwa ni yote katika yote.

Wakati wa kuongoka kwake, Paulo alisukumwa na shauku ya kuwasaidia wanadamu wenzake kumtazama Yesu wa Nazareti kama Mwana wa Mungu aliye hai, mwenye uweza wa kubadilisha na kuokoa. Tangu wakati huo na kuendelea maisha yake yote yaliwekwa wakfu katika jitihada za kuelezea upendo na uweza wa yule aliyekuwa amesulubiwa. Moyo wake wenye huruma uliwaelekea watu wa madaraja yote. Alisema, “Nawiwa na Wayunani na wasio Wayunani, nawiwa na wenye hekima na wasio na hekima.” Warumi 1:14. Upendo wake kwa Bwana wa utukufu, aliyekuwa akimuudhi kupitia kwa watakatifu Wake, ulikuwa ndiyo kanuni iliyokuwa inabidiisha mwendendo wake na nguvu iliyokuwa inamsukuma katika utendaji. Kama nguvu zake katika njia ya kazi zingepungua, alikuwa anaangalia mara moja na kwa haraka msalabani na upendo wa ajabu unaofunuliwa pale, ulikuwa unatosha kumfanya kufunga mkanda wa viuno vya moyo wake na kusonga mbele kwenye njia ya kujikana nafsi....

Kwa nguvu za Roho Mtakatifu, Paulo alisimulia kisa cha kuongoka kwake kwa muujiza na jinsi alivyoayaamini Maandiko Matakatiifu ya Agano la Kale yaliyokuwa yametimizwa kikamilifu kwa njia ya Yesu Mnazareti. Maneno yake alikuwa akiyanena kwa uzito na umakini mkubwa ... kwamba alikuwa akimpenda Mwokozi aliyesulubishwa kwa moyo wake wote. Waliona kuwa moyo wake ulikuwa umetulia kwa Kristo, kiasi kwamba maisha yake yote yalikuwa yameshikamana na Bwana wake....

Paulo alitambua kuwa utoshelevu wake haukuwa ndani yake, bali ulikuwemo ndani ya Roho Mtakatifu, ambaye mvuto Wake mwema uliujaza moyo wake na kuileta kila fikra katika kujisalimisha kwa Kristo. Alijisema mwenyewe kuwa “siku zote twachukua katika mwili kuuawa kwake Yesu, ili uzima wa Yesu nao udhihirishwe katika miili yetu.” 2 Wakorintho 4:10. Katika mafundisho ya mitume, Kristo alikuwa ni kiini muhimu sana. Paulo alitamka, “bali si mimi tena, bali Kristo yu hai ndani yangu.” Wagalatia 2:20. Ubinafsi ulikuwa umefishwa na Kristo alikuwa anadhihirishwa na kutukuzwa (**Matendo ya Mitume, uk. 212 – 217**).